



**Komunikadu Imprensa**  
**29 Abril 2025**

**Komemora Aniversáriu JSMP ba XXIV: JSMP lansa relatóriu importante rua ne'ebé destaka progresu no dezafiu sira iha setór justisa no lejislativu iha Parlamentu Nasionál hamutuk ho relatóriu institusionál 2024 nian**

Komemora Aniversáriu JSMP ba XXIV, JSMP lansa relatóriu importante rua – Relatóriu Observasaun Jerál Setór Justisa 2024 no Relatóriu Observasaun Parlamentar 2024 ne'ebé destaka progresu no dezafiu sira iha setór justisa no lejislativu iha Parlamentu Nasionál hamutuk ho relatóriu institusionál JSMP 2024 nian.

“Relatóriu hirak-ne'e subliña setór ida-idak ninia progresu ka atinzimentu sira, diskuti no elabora preokupasaun relevante sira ne'ebé JSMP deskobre iha setór justisa no lejislativu no propoin rekomendasaun ba entidade kompetenti sira atu konsidera no hadi'ak liután iha futuru”, dehan Sra. Ana Paula Marçal, Diretora Ezekutiva JSMP.

Iha relatóriu Observasun Jerál Setór Justisa 2024, aborda dinamika evolusaun esforsu sira, avalia progresu no dezafiu sira iha setór justisa iha jerál no enfaze ba kazu sira ho natureza Violénsia Bazeia Jéneru (VBJ) no violénsia hasoru labarik nu'udar foku prinsipál monitorizasaun JSMP nian, inklui servisu asisténsia legál ba vítima sira violénsia bazeia ba jéneru.

Alende ne'e, relatóriu ne'e kompila akontesimentu xave no relevante sira hanesan mudansa kona-ba política lejislativa, iniciativa reforma justisa, investimentu ba setór justisa, tendénsia Orsamentu Jerál Estadu (OJE) ba setór justisa ne'ebé lakonsistente kada tinan, avalia trend rekursu umanus atual, no fasilidade sira iha setór justisa, produtividade setór justisa no mós evolusaun relevante sira seluk ne'ebé influénsia kapasidade no qualidade funksionamentu setór justisa hodi aseguara justisa tuir lei haruka.

“Relatóriu hirak ne'e nu'udar kontribuisaun JSMP nian ba setór justisa no dezvoltamentu lejislativu iha Parlamentu Nasionál hamutuk ho relatóriu institusionál ne'ebé deskreve JSMP ninia atividade sira ne'ebé halo durante tinan 2024”.

Entretantu, iha relatóriu Observasaun Jerál ba Parlamentu Nasionál 2024, apresenta no avalia produtividade iha prosesu lejislativu ne'ebé diskuti funksionamentu plenaria sira, devér sira deputadu nian tuir lei, servisu fiskalizasaun deputadu sira. Relatóriu ne'e mós identifika nesidade atu husu Parlamentu Nasionál halo revizaun ba provizaun sira iha Konstituisaun ne'ebé dezatualizadu ka la korresponde ho dinamika no evolusaun sistema estadu atual no rekomendasaun kona-ba alterasaun Kódigu Sivíl hodi inkopora materia diskriminasaun iha kazamentu ne'ebé define iha artigu 1475 Kódigu Sivíl.

Entretantu iha Relatóriu Institusionál ne'e foka liu kona-ba atividade sira JSMP nian durante tinan 2024 inklui kooperasaun institusionál tantu nasionál no Internasionál, no apoiu finansieru hosi doadores sira nu'udar justifikasaun no forma akuntabilidade ba púliku.

Relatóriu Observasaun Jerál Setór Justisa no Relatóriu Observasaun Parlamentár ne'e konklui ho rekomendasaun importante no relevante ba órgaun no instituisaun kompetente sira atu bele tau iha konsiderasaun. JSMP hein katak rekomendasaun importante hirak ne'e bele hetan konsiderasaun hodi hadi'ak funsionamentu sistema justisa formál no lejislativu iha futuru. Relatóriu sira ne'e bele asesu iha JSMP nia website <https://jsmp.tl/>

Lansamentu ne'e Partisipa hosi Prezidente Tribunál Rekursu, Juis Konselleru Meritisímu Dr. Deolindo dos Santos, Exelénsia Ministru Justisa Dr. Sergio Hornai, Exelénsia Sekretaria Estadu Igualdade (SEI) Sra. Elvina de Sousa Carvalho, Meritisímu Dignisímu Prokuradór Jerál Repúblika Dr. Alfonso Lopez, Exelénsia Provedór Direitus Umanu no Justisa, Sr. Virgilio da Silva Guterres, Koodenadór Reforma Judisiáriu Dra. Lucia Lobato, Adjuntu Prokuradór Jerál Repúblika na'in tolu, Xefe Prokuradór Primeira Instánsia Dili, representante embaixadór Nova Zelandia, Representante embaixadór Uniaun Europia, Representante Embaixadór Australia, Representante Embaixador Filipina, Representante Embaixadór America, Representante PNTL Munisípiu Dili, doador sira hanesan The Asia Foundation TAF Nabilan, UNDP/Koica, Humanis, UN Women. Alende ne'e, partisipa mós hosi parseiru serbisu sosiedade sivíl hotu, dosente UNITAL, UNTL, Estudante Universitáriu sira no inklui mídia sira.

Atu hetan informasaun kompletu favor kontaktu:

Ana Paula Marçal  
Diretóra Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)